



# TRANSACTION

*Entre Monseigneur l'Archevesque  
de Paris,*

Monseigneur le Duc de Verneüil, Abbé de  
Saint Germain des-Prez, & les Religieux,  
Prieur & Convent de ladite Abbaye.

*Sur leurs Procès & Differens, pour raison de la  
Jurisdiction spirituelle dans l'étendue du Faux-  
bourg & Territoire dudit S. Germain des-Prez.*



ARDEVANT les Notaires & Gardenotes du Roy  
nostre Sire en son Chastelet de Paris, sous - signez :  
Furent presens Illustrissime & Reverendissime Mon-  
seigneur Haroüin de Peresfixe, Archevesque de Paris,  
Conseiller du Roy en ses Conseils, & Chancelier de  
ses Ordres, demeurant dans son Archevesché, d'une  
part; Tres-haut & tres-puissant Prince Messire Henry  
de Bourbon, Duc de Verneüil, Pair de France, Gou-  
verneur & Lieutenant general de sa Majesté en sa Province de Langue-  
doc, Abbé Commendataire de l'Abbaye de S. Germain des-Prez, im-  
mediatement dépendante du S. Siege Apostolique, demeurant au Faux-  
bourg S. Germain en son Hostel Abbatial, d'autre part; & RR. PP. Doms  
Claude du Ruble, & Jacques Douceur Religieux Anciens, Antoine Espinace  
Prieur, Benoist de Jumillac Sous-Prieur, Estienne Vicard, Placide de Sarcus,  
Gregoire Bodin, Martin de Liefme, Luc Dachery, Gregoire de Villeneuve,  
Arsenne Moriceau, Ambroise Ianvier, Gilles Pichotel, Louis Boudan,  
Bernard Jolly, Jean Prou, Jean Barré, François Charpentier, Jean de Leau,  
Joseph Bequin, Louis de Vion, Jean - Chrysostome Cornet, Hierôme



3  
Huret, Henry Constance de Brossard, Jacques Dandelle, Pierre Guerin, Bernard Iloré, Jean Patte, Nicolas Picard, Barthelemy Thibaud, Estienne Motron, Yves le Roy, Jean-Louis Ballavoine, Joseph de la Pierre, Louis-Augustin Couturier, Robert Chevalier, Alexis Gendrier, Adrien Charpentier, Pierre Loüet, & François Marlot; tous Religieux de ladite Abbaye saint Germain, Ordre saint Benoist, Congregation de saint Maur, Capitulairement assemblez en leur Chapitre en la maniere accoustumée, pour traiter d'affaires, encore d'autre part: Lesquelles parties pour terminer leurs differens pendans en la Cour de Parlement de Paris, sur ce que ledit Seigneur Archevesque pretendoit avoir (à cause de sa dignité Archiepiscopale) toute Jurisdiction spirituelle dans tout le Faux-bourg & Territoire de saint Germain des-Prez lez Paris; & au contraire estoit soutenu par lesdits Seigneur Abbé, Religieux, Prieur & Convent de ladite Abbaye, que ledit Faux-bourg & Territoire de saint Germain des-Prez estoit exempt de la Jurisdiction dudit Seigneur Archevesque, & qu'eux & leurs predecesseurs Abbez & Religieux de ladite Abbaye y avoient eü & exercé toute la Jurisdiction spirituelle & comme Episcopale; de laquelle ils jouissent encore à present, fondez en titres & possession immemoriable; Ont transigé desdits differens, circonstances & dépendances en la maniere qui ensuit. C'est à sçavoir,

Que ladite Jurisdiction sur tout le Faux-bourg & Territoire dudit saint Germain des-Prez lez Paris, les Seculiers & Reguliers y demeurans; ensemble la collation des Cures dudit Faux-bourg & Territoire establies, & qui seront cy-apres erigées dans iceluy appartiendront audit Seigneur Archevesque, & seront lesdites Jurisdiction & collation unies à la personne & dignité, & de ses successeurs Archevesques seulement.

Que ladite Abbaye de saint Germain des-Prez & enclos d'icelle, ensemble l'Abbé Religieux, Prieur & Convent, leurs familles & domestiques, & autres y residens, demeureront exempts de la Jurisdiction dudit Seigneur Archevesque & de ses successeurs.

Que la Jurisdiction, de laquelle l'Abbé, Religieux, Prieur & Convent de ladite Abbaye de saint Germain des-Prez ont esté & sont à present en possession dans ladite Abbaye & enclos d'icelle, leur demeurera à toujours immediate au saint Siege telle qu'ils l'ont possédée, & la possèdent aujourd'huy, sans toutesfois qu'ils puissent créer aucun Official ni accorder aucune dispence de Bans, ni mesme connoistre des causes de Mariages desdits domestiques.

Que le Prieur des Religieux de ladite Abbaye & ses successeurs sera Vicair general né perpetuel & irrevocable dudit Seigneur Archevesque & de ses successeurs, pour exercer la Jurisdiction ordinaire dans l'estenduë dudit Faux-bourg & Territoire dudit S. Germain des-Prez; & en cas d'absence, maladie ou autres legitimes empeschemens, son Sous-Prieur ou autre tenant son lieu & place, agira en la mesme qualité dans ledit Faux-bourg & Territoire, sans toutesfois que ledit Vicair general né, ni ceux qui en feront les fonctions en son absence puissent faire aucune visite sur les Prestres & Communautéz seculieres dans ledit Faux-bourg & Territoire sans une



3

permission speciale dudit Seigneur Archevesque, & sans que l'establissement dudit Vicaire general ne puisse empêcher ledit Seigneur & ses successeurs Archevesques de créer encore d'autres Vicaires generaux pour ledit Faux-bourg & Territoire, lors qu'ils le jugeront à propos; & en ce cas, lesdits Vicaires generaux exerceront conjointement ou separement avec ledit Vicaire general né; lequel en cette qualité, pourra toutes fois & quantes faire donner la Confirmation, & faire celebrer & conferer la Tonfure & les Ordres mineurs & sacrées dans ladite Abbaye aux Religieux de leur Congregation de saint Maur seulement, sans que ladite qualité de Vicaire general ne puisse prejudicier aux susdites exemption & Jurisdiction de ladite Abbaye, & sans les y pouvoir faire conferer aux Seculiers sans la permission expresse dudit Seigneur Archevesque & de ses successeurs.

Que les Mandemens qui seront envoyez en leur absence audit Faux-bourg & Territoire seront concertez, conclus & signez dudit Prieur, & de ses successeurs ou autre, faisant les fonctions dudit Vicaire general né en son absence, conjointement avec les autres Vicaires generaux, si aucuns luy sont adjoints.

Que la presentation de la Cure de saint Sulpice appartiendra audit Seigneur Abbé Religieux, Prieur & Convent & leurs successeurs, avec tous droits de Curez Primitifs: & quant aux Cures que ledit Seigneur Archevesque ou ses successeurs pourront eriger cy-apres dans ledit Faux-bourg & Territoire, Il a esté convenu qu'elles seront conferées la premiere fois par ledit Seigneur Archevesque, de plein droit, & pour toutes les vacances futures, mesme en cas de permutation, que l'Abbé y presentera; & en cas de vacance de ladite Abbaye, lesdits Religieux, Prieur & Convent y presenteront comme ils ont droit & sont en possession de pourvoir à la Cure de saint Sulpice, le siege Abbatial vacant; mesme y auront aussi tous droit de Curez Primitifs.

L'Eglise de leur Abbaye demeurant pour toujours l'Eglise matrice & principale de toutes celles qui sont & seront cy - apres erigées dans ledit Faux-bourg & Territoire: Seront faites en icelle les convocations du Clergé & du peuple dudit Faux-bourg & Territoire, tant pour les Processions generales qu'autres solemnitez publiques, & jouira de tout les droits & honneurs qui luy appartiennent en cette qualité.

Et attendu que S. Germain est le Patron principal de ladite Abbaye, Faux-bourg & Territoire, sa feste continuera d'estre chommée comme elle l'a esté par le passé.

Lors des Jubilez, la premiere Station sera toujours assignée par ledit Seigneur Archevesque & ses successeurs ou par ledit Vicaire general né, & autres ses adjoints dans l'Eglise de ladite Abbaye, sans que cet usage puisse prejudicier ausdits droits d'exemption & Jurisdiction d'icelle.

Et attendu que l'Eglise Paroissiale de saint Sulpice, & autres Eglises qui sont & seront erigées dans ledit Faux-bourg & Territoire ne peuvent estre qu'inferieures à l'Eglise de saint Germain des-Prez, ledit Seigneur accorde tant pour luy que pour ses successeurs Archevesques, que les Superieurs desdites Eglises & Communautez ne pourront estre choisis pour grands Vicaires dudit Faux-bourg & Territoire.

4  
Et moyennant les conditions dessusdites, demeurent lesdits differens d'entre les parties terminez & assoupis sans dépens, dommages & interests de part ni d'autre. Et pour faire homologuer en Cour de Rome & par tout ailleurs où besoin sera la presente Transaction, ont lesdites parties constitué leurs Procureurs les porteurs des presentes, auxquels ils ont donné pouvoir de ce faire. Ce fait en la presence & du consentement du tres-Reverend Pere Dom Bernard Audebert, Superieur general de ladite Congregation de saint Maur resident en ladite Abbaye de saint Germain des-Prez, & des Reverends Peres Doms Benoit Bracher, & Claude Martin ses assistans, & de l'avis & conseil des venerables & discrettes personnes Messires Claude Morel Docteur de Sorbonne, Conseiller du Roy en ses Conseils, Chanoine Theologal de l'Eglise de Paris, Martin Grandin, Denis Guyart, Guillaume Lestoc, François de Hodenc, & François Vinot, tous Docteurs en Theologie de la Faculté de Paris; De noble homme Ange de Massac Advocat en Parlement, & de Messire Charles Coquart de la Motte, Chanoine & Sous-Chantre en l'Eglise de Paris: Et pour l'execution des presentes & dépendances, lesdites parties ont esleu leurs domiciles irrevocables; sçavoir ledit Seigneur en son Archevesché, ledit Seigneur Abbé en son logis Abbatial, & lesdits sieurs Religieux en ladite Abbaye, auxquels lieux, &c. nonobstant, &c. car ainsi, &c. promettans, &c. obligeans chacun en droit soy, &c. renonceans, &c. Fait & passé, sçavoir par leldits Seigneur Archevesque, Abbé, Peres, Superieur assistans & presens audit logis Abbatial, & par lesdits Religieux en leurdit Chapitre l'an 1668. le 20. Septembre avant midy, & ont signé la minutte des presentes demeurée à Lemoine Notaire. Signé GABILLON & LEMOINE Notaires.

